

## Gianni Vescovi Vischofar

### DAR GROOSE GANKH BON SLEGHE

Dar hümmel noch tunkhel , denau , de stearn glitzanten , habent gazoghet bia börte gabeest dar khemmanten tag . An lichte hat galoichtet oona naach de andarn alle de bestardar bomme lentle . Antia tüar un antia sküura hat zich gatan offen gaiganten .

In' s tunkhele hat zich gahort tottaran eppadoas , un alle aname stroche an ruufe ....

Gheebar ? zeit-ar barootet ? Has-to galummet au de ojar ? Ja, ja gheebar , gheebar mettanandar , eppadoas hat aanbortet .

Bon baitame an laut .. dar Mattio !! De groosorste klokka me klokkenturme bon Sleghe hat kaif galoitet bia so bellan rüufan nagane alle de slegar.

Sommorgande d' eersten liichtar boname nojen taaghe... , badar net an tag bia de andarn , dar schöndorste un dar pessorste tag bor de loite bon Sleghe . Hoite is-ta dar groose gankh , ja , dar groose gankh umme de belt .

Sobia alle de jaar in de bilghe me d'aufart siar alle de slegar , siban komoinar , un bromadar och , gheen-za so machan diizen gankh umme naach in merchen me komaun bon Sleghe , peetanten un zinganten

An ghebroche ba borliiert zich in de nacht bon saiten ....Soon im-me jaare 1488 dar bissoff bon Padobe hat gaprechtet naach diizame gankhe . Beels jaar de faffe zeint gant baigan alle de khroitzen , de biisen un d'ekhare peetanten in Guuten Heere so bohüutan ' s gazammalach bomme saure

Darnaach me jaare 1631 de Slegar habent gahöbet aan so machan dar selbe gankh bia hoite

pa taaghe so khödan borbais-Gott me Guuten Heere bor de ende dar druuse dat biil toote, hat galasset eerzing

Khutten bon loite met-me rukzakhe fan aksel , sbearn suughe , an huut so bohüutan in khopf un an trettastab , bor an tag lassent de zain hoizar , de zain lentlen , biighen un erbot . Hoite missa-bar net steenan hoam , hoite missa-bar gheenan ,bia habent gataan d' ögnar alten , missa-bar haltan au de ghebroche!

Bon in ekkarn umme naach ,alle tretten aan büar in iidar gheghen de mitten bon Sleghe .

Umme zeks oarn dar platz bomme steetle ist bolla loite , un asò alle de beeghe nagane , innont dar kherchen de eersten gapeete , de eersten gazenghe ,boar so gheenan dehiin , boar so gheenan büar mettanandar . Dar faff borset me Guuten Heere so senkhan in loiten an guutar tag , gadenkhet alle dii ba zeint net hia , alle dii ba zeint ziich odar berre . An pensiiro och bor de erme toote

Denne dar toar tuut-zich offen , an mann bool garüstet met aname rooten baanen in de hente khimmet aus bondar kherchen . Fan baanen is-ta an baisses khroitze och bon baitame boll gazeghet, ba moonet Krist dorlentic . Un denne, manne , baibar , khindar , alten un junghen , dar faff un de mokoln och , alle so folgan in mann met-me baanen . De klokken loitent heftig , bia so grüusan alle , un khödan barzeganzich .

De loite höbent aan treetan büar naah in beeghen bon Sleghe , bear peetet , bear zinghet , bear sbaighet , badar alle zeint lustig un prottar so zeinan da .

Kaum aus bomme lante de prosessiuun snappet an khloas beegale , ba büuret ka dar Rendolen , de spitze bon perghen zeint noch gadekhet bomme sneebe , de brisse luft dorbekhet bear hat umme noch an mintzig slaaf ,un de zunna ,noch sbach bermet au 's nasse gras bomme toogabassare dar nachte

Pa saite me beeghe ,biil stoan platte , laaben hia un dà , antia pillale un antia khroitz , ba dar faff haltet sich so baigan un khödan au an gapeet . De loite zegentzich .

Denne noch büar obarndrau d' ekkarn bomme Ferragh , bran in Laiten finz ka me lentle Stokhar .

Folganten 's taal ba büuret kan Meltar ,un khroitzabeg Lukka , hortan zinganten de alten letanje , riibe- zich kan Laaserle . In diiza zaita , in de sait dar druuse zeint gabeest gatraghet de ziiche loite, un hia bear ist net gapessart och bograabet . Hemmest is-ta an söos biizele , umme naach poome boramballe ,un an kherchle garüufet Hooligar Sisto . Hia de prosessiuun haltent zich bor de eerste botta .

Kan Laaserle , dar faff khödet de misse un denne is-ta an mintzig sait so rastan . Fan biiza , alle de famejen habent de zain zaita ba setzan sich abe ,so imbormessan odar trinkhan an tröpfle mettanandar .

An khüttele loite zinghent , andarn prechtent , andarn noch zeint galeghet fan rakh met-me rukzakhe untar me khöpfe . Hia , alle de heertekhote un alle de pensiiren bor an mintzig sait dorplitzighent , de zeela un 's heertze möghent khearan so füulan de natura umme naah , füulan 's gasmekh me balle , de brisse luft ba machet sittaran de teetzen bon boichten un lerchen , 's gazang boname bogalle loogart süssen in plaatzen bonara puuchen . Un denne , de khindar ba sraiganten un loofantent hia un dà prenghent son allen frooakhot un machent lechalan och dii ba lachent nia .

Hemmet, bor de baibar is khent de sait so siigan aus de gaberbane ojar . Ja , söon antia tag boar de groose rogaziun , baibar un diarn gheent naach gras , bozuntare greezar ganuzet so berban. Denne in de home de ojar zaint gamacht ziidan un gaberbet nutzanten diize greezar , odar met aname purstle , ze berbent au pluumelen , sbizellen , hertzlen un asò büar ...

Kaum de berbe ist gabeest dorre , de ojar zeint gabeest garibelt met-me öole finzmai ze habent gaglizzet , denne galeghet inn in an zekhle , un ditzan inn in rukzakh barootet bor de prosessiuun .

De diarn habent gasenkhet 's pessorste oa me zain puular , odar son aname khelle , so bellan sogan en de zein liibekhot odar de zein khellekhot .

An botta , benne de prosessiuun ist gabeest riivart au Kamparube de junghe ba habent gahat gasnappet 's oa ka me leesarle , habent gasenkhet eertzing in diarn an guuta un züuse zamberla

Junghe un diarn paiten diizen tag biil maanade

Badar , 's garast ist palle gariibet , dar baano ist söon kastau , bool gahaltet in de sterche hente bomme tragar baanen , dar faff , de mokoln un laise laise alle de loite barootent sich so gheenan büar , rukzakhen fan aksel , huut fan khopf , de jaketta gapuntet umme naach me pauche , hemmet ist net mear khalt , de spaichen dar zunnan höbent aan kukkaran süssen in poome , liichtanten an destar beg gadekhet metten peechar un süurtzen , trettan übar prear so zeinan obarn an gris, linne un morbiot . Dar faff khödet au an paar Grüssa-dich Maria , denne noch alte letanje , gazanghe un gapeete , un hortan büar atamanten an luft met aname gasmekh bon pech

Net berre horr-zich eppadoas tottaran , an gatumpalan sbear so bosteenan , dar beg hemmet ist stikhel , pazait ambidar stoan platte un denne de hoizar me lentle Pölsen , an biil altes pillale un an holtzarne khroitze met-me Guuten Heere . An viar mennese naach paitan de prosessiuun , oondar met anara sikkale bolla brisse bassar gasiighet au bomme prönnen .

Eppadoas haltet sich so trinkhan an tröpfle , andarn büllent au an botza odar an pütтарokh , khödanten : 's bassar me prönnen ist hortan 's peste .....

De tünkhale me balle lasset de zaita in biizen un ekkarn , de hochebane tüunzich offen bran in ooghen , alle de dingar hemmet prearn höotarn un boll gaberbet . Bran izandarn Sleghe , atte rechte zaita Ghel , untar me hintarkhnotten Kamparube , net bait Roan , un dellont me taale Robaan un Toballe . Berre zeeghent sich och Aspach un Rotz . Noch in saatom Kunka un Zuune . Prearn alle toitze lentar, an soos gazegach ...

Noch in saatom ist och dar beg dat hemmet büuret kan kabarlaba ,ar ist prüugalot , biil loite , an enghes un nesses beegale , loam untar in suughen , ist eeze so skliiban un ballan .

Gheebär büar laise khödet eppadoas , palle , ditzan beegale riibet un höbet aan an dar groose beg arabe , un bissa-bar ...gheenten arabe alle de holighen hölfent ...

Untar izandarn de ebane me lentle Sbantz , alte hoizar , stellar , antia gaarto nochont gamach au , antoal barootet so huan , in an kantaun fasiine bon gheertelen ganuzet bor zetzan iidar fazöol , misthaufen hia un dà

De rogaziun gheet böraan , dellont me ghelpach un aran , gheghen 's lentle Gajga . Eppadoas hat hemmet amboortet : Bissa-bar ...gheenten aran hölfat-ar zelvort ...

De zunna hemmet ist gabeest hoach un hat huppesch dorbermet , de zain spaichen habent gataan offen de pluumen bon rajikken , in an mintzig sait , untar aname hummel plabe un hootar , sobia an gabundart , de biizen zeint khent alle gheelbe un boll gaberbet , in sattom insteet , 's gras prear noch grüunar .

Beetor büar me merche met-me komaun bon Robaan un dellont me groosen beghe ba büuret in ka Sleghe , höbet aan' s beegale so gheenan au Kamparube , an lentle galet in de zunna süssen grüunen biizen un bellar , ba an botta de loite habent galeebet machanten au holtzarne bessar , un ba , de striin habent gatanz padarnacht umme naach me tanzarloche dorkhlupfanten alle.

In diizen tag , de paurn tüunent offen alle de lukhen bon soinen' so lassan gheenan büar de prosessiuun ane sbeerekhote , antia botta ze meent och 's höobe naah me beeghe , asò dat , benne 's reeghent de loite möghen net dorbaagan-zich de suughe un de prüuche ba ar ist sünfot .

Noch an halba oora , noch an scentle un denne dar gankh haltet sich an andara botta , diiza botta anmindor an paar oarn . Bon baitame hemmet zeeghent-zich de hoizar me lentle ,alle naach me beeghe , alle gahanghet mettanandar , sobia haltan sich bor hant , metten stikelen decharn un alten maurn gamerchet bondar saite . Obarn an ekkale , de khercha ,un atte senkhe zaita dar stönnarn klokenturm .

Dar tragar baano ist nagane in eersten hoizarn bon Kamparube un dar mezanar gaholfet bon viarn junghen höbet aan so machan loitan de klokken bia in de höogarste baartighe , un ze gheent büar finzmai alle zeint riivart . De khütta gheet büar dort dar enghe beg me pachare , de alte gazanghe gazunghet innont diize kantaune machent

khemman de henna haut , prear so zeinan gakeheart eerzing undart jaar . Bittane stünste !  
 In an mintzig sait zein-ta loite borambralle , naah me beeghe , bran in hoizarn un bran dar kherchen . Eppadoas gheet so essan in de tabearn , badar de meerorste amme eerste züuchent aus an destar zaita in an biiza ,siighent aus an dekhe bomme rukhzakhe, un loonent ze süssen ' s gras un de pluumen , siighent zich abe de jaketta , un zetten sich iidar leganten in rukhzakh hinten me rukken . Bo Huppesch mögan essan proat met-me kheeze un trinkhan an tatza guute bain hia gazotzet . Asò machent och biil famejen , khütten bon junghen , puuben un diarn . Darnaach haban ghesset eppadoas trinkhet an tatza kafè gatraghet bon home , andare gheet so trinkhan en in de tabearn , och met anara sniiten kasenzen .  
 Denne , khimmet ' s galüst so lengarn-sich iidar un napfan an mintzig , haltanten offen an ooghe so luugan zegan benne dar tragar baano gheet büar .

Och hia Kamparube , sobia in biil andarn lentlen , an botta zein-ta och gabeest gamacht de rogaziuune , badar net asò groas un de loite habent khöt au anloan gapeete , ane tottaran , lachan odar khödan iidar , bia gaseghet hoite pa taaghe .In de drai taaghe boar d' aufart , as morganse brüu met-me faffe un mokkoln zoi zeint gant so baigan de drai khroitzen . Dar eerste tag 's khroitze me lentle Vischofar ,nagane me merche bon Sleghe , dar sbeente tag' s khroitze dar Tanela , nagane me merche bon Roan . Dar draite taag , dar groose gankh , ' s khroitze Vischofar , ' s khroitze Tanela , iidar in de Ass taal ,un denne au , snappanten ' s beegale bondar alten laiten finz bran me kherchle Höel , ' s draite khroitze , odar , 's khroitze bon Pabeegarn .  
 Meeront odar mindor ist gabeest asò och in de andarn lentar , de khroitzen sein gabeest garüufet " Bettarkhroitzen ,, un ze hötten gahat so haltan berre sbentze un saur . Bran in khroitzen de zingarn habent gasbaighet un de baanen galet iidar , dar faff hat sich gahaltet un gabaighet de viar binte

Hoite pa taaghe de alte rogaziuune zeint siar alle dorplinzighet , bolaibent anloan doi me lentle Mösele un doi me lentle Oba un zeint gataan in de braitag boar d' aufart

Umme sbeen oarn is sait so lemman ambidar in gankh , bor de loite ist gariibet so rastan , dar baano ist soon naah me beeghe dat büuret aran untar me Rasten un denne arabe ka-me lentle Büscar un Bald .  
 Ist an mintzig sbear höban aan anbidar trettan met-me pauche boll un naach haban garastet. De buuse machent bea , de suughe prearn khent enghe un heertar , un legan aan ze an andara botta ist gabeest an gapainach .  
 Badar , halta-bar heerte un gheebbar , gheebbar mettanandar ....  
 Amme eerste dar beg ist stikhel , denne mindor , badar ar ist destar un bait finz untar me Rasten , hemmest kheeranten atte rechte zaita ar ghet arabe süssen aizen , sorken un antia holtzarne hütta , gheenanten büar henten in stellarn un in hoizarn me lentle Büscar .  
 Net berre , untar me perghe Katz 's lentle Bald , an khutta bon hoizarn un an khloas kherchle . Hia atte buuse me perghe is-ta noch eppasen so trinkhan , brisse bassar odar kafè odar noch an tatza bain , justo so gheeban muut in loiten boar so höban aan de laita me Katze , an biil stikhel laita ba machet sbitzan un maartaran , eppadoas miss haltan sich biil berte so siigan au in atom , eppadoas miss kheeran eerzing , badar laise laise de meerorste riibent au sobarst siiganten an groose zoicht .  
 Untar me khroitze fan spitze dar faff khödet au an gapeet . Denabe , Sleghe un alle de lentlen umme naach , alles asò grüun , grüun un gheel , de spaichen dar zunnen spiighelnt-zich in de laabe hia un dà , bon hia obarn zeeghet -zich och de khercha bon Sleghe ,ze prear asò nagane , badar is-ta noch an langar beg so gheenan

Hemmest , darnaach me püutarle , is-ta so gheenan iidar , gheenan abe süssen boichtebellar un paskoldar , hia is-ta net mear dar beg , badar an andara laita noch meeront stikhel un ist eeze so ratzalan . Badar... gheebbar abe, hörtan mettanandar....

Amme leste inzoart dar laiten , de ebane . Och diiza hertekhot ist gant büar . Net bait , 's lentle Loch , un denne de Untar Rigunnar , ba is-ta noch oondar ba ghet aus eppasen so trinkhan bran me hause me Marien Rigunnar Stern . De possessiun haltet zich bor de leste botta kan bellalen me Ghelle , un hia , de diarn un de baibar züuchent remmallen , plüumlen un sbizellen so machan au an khrantzle denne galet fan khopf machanten en sön .  
 Eppadoas leghet mettenandar an metzle plüumlen so hangan's fan stap odar fan huut un rukhzakh .  
 Och dar baano khimmet gamacht söondar metten teetzen bon boichten un lerchen  
 Dar faff dat finz hemmest hat ar gatrettet , staighet au son aname rosse un fan zattel ar raitet finz ka Sleghe  
 De loite folghent-en peetanten un zinganten . Denne de lentlen Ebane un Lise boar so kheeran gheghen dar groose un bait beg ba büuret ambidar in de khercha . Pazaitte me beeghe zbeen bettinkhen bon loite dat grüusent metten hente , un barootet so pükharan in khopf un zegentzich benne dar faff baighet .  
 Nagane me kherchle me Holighen Karlen is- ta an khüttele bon junghen baibarn metten khindarn süssen in ermen ba habent sich gapuntet in andarn naach gheenan in de khercha

Noch mintzig triite un denne och diiza rogaziuun ist gariibet , dar platz , ` s haus me komaune , un de khercha , so khödan au `s leste gapeet un zingan `s leste liid , bail dar Mattio un alle de andare khlokken loitent bia so bellan infanghet ambidar hoam alle , dar faff khödanten borbais-Gott me Guuten Heere baighet alle .

Hemmest is khent de sait so kheran hoam , de zunna ist naach gheenan iidar hinten in perghen asabanse un `s licht boname tag dat möga-bar net borghessan ist naach leesan zich Dar groose gankh umme de belt noch an botta hat gabüllet aan de heertze bon froakhot un böole , ar hat galet mettanandar baibar un manne alten un junghen , och khsellen un fainten Dar groose gankh ist net anloan an gankh naach in merchen bon Sleghe , badar an roas bon loite dat denkhanten de dorganghene sait tretten mettanandar süssen d ` ögnarn taaghe un de sait ba hat so khemman . Hoite `s gapuntach mettar ögnar eerden ist sterchor , de buurtzen zeint boll gazetzt süssen in stoaupatten pazaite in beeghen , süssen in tannen , in lerchen un boichten , süssen de alten hoizarn metten stikhelen decharn . Hoite , `s gapuntach ist sterchor och metten loite dat habent gatrett mettanandar peetanten un zinganten untar aname hümmel plabe dat ar hat infanghet alle .

Kheranten hoam de müudekhot tüüt zich füulan , badar im-me ögnar khöpfe is-ta noch `s garüskhalan bon tritten fan gras , zein-ta noch de alte baiglen boname gaprechte khent bon baitame ,an gaprecht net mear bostant , zein-ta noch de alte letanje un de gapeete . Khera-bar hoam met-me hertze gafroant un met-me troste so borkhemma-bar zich ambidar `s jaar ba khimmet , un ambidar gheenan , ambidar gheenan mettanandar !!